

# LO PITCHÓ MELET É LO TSARET

## PATOIS DE NUS - COLLINE

(PAR FABIO BRUNIER)



[1-2] N' ae in co in pitchó melet qué sé promén-ae to fiel, in trottèn é in dzoyèn avoué lé minó di veladzo. In dzen dzol, sisse minó n'an deu-se : « Ah comèn sarie dzen sé lo pitchó melet n'isse in tsaret ! ».

[3-4] Adòn lo gan n'a deut : « É bén, vé lo fio mè lo tsaret ! ». Adòn n'a prèi dé lan, n'a prèi lo martélet, n'a prèi la résetta, n'a prèi lo verboquén, n'a prèi lé cllo, désèn n'a réchà, copó, tsapotó, é pin é poun, é pin é pan... n'a fet in dzen tsaret.

[5-6] Apré n'a co fé lé roe dé bôc, n'a beto-lle in dzen sercllo a l'entol é n'a tsaldjà lé minó dussù lo tsaret. Mondjemè qué contèn lé minó ! É lo pitchó melet co dé pi : llou douàn é lo tsaret apré !

[7-8] Can lé pomme l'ian moye, lé minó lé tsaldzaon dussù lo tsaret. In dzen dzol, n'an tsaldjà lo tsaret plen dé pomme mémo sé lo pitchó melet lle diae : « Na pâe, l'é tro pezàn ! ».

[9-10] Ma lé minó n'an pa écoute-lo, i contréo n'an djontó incò d'atre pomme... Pâe, can lo pitchó melet l'é partì, lo tsaret... n'a fé crac ! Lo pitchó melet, in ploèn, diae : « Naaaa, lamondjeu... lo mén dzen tsaret ! ».

[11-12] Pé boneul qué lo gan passae dé lé é n'a démandó : « Ma coui l'è qué ploé? ». Lé minó adòn n'an deu-lle : « Ah, l'è lo pitchó melet perquè lo tsaret l'è rot ».

[13-14] Adòn lo gan n'a détacó lo tsaret, n'a tolnó prendre lo martélet, la résetta, lo verboquén é lé cllo, é pin é poun, é pin é pan... n'a arendjà lo tsaret.

[15-16] Lo pitchó melet l'ie to contèn ma n'a deut : « Si co, minó, betade pamé tan dé pomme dussù lo mén tsaret ! ». É lé minó di veladzo, to contèn qué lo pitchó melet n'ae queuttó dé ploé, n'an fé in dzen rion a l'entol di tsaret.